

Iskoristi dan



Postoji realna mogućnost da se postigne dogovor o reformi policije i da se osigura potpisivanje Sporazuma o stabilizaciji i pridruživanju, napisao je visoki predstavnik i specijalni predstavnik Evropske unije, Christian Schwarz-Schilling, u svojoj sedmičnoj rubrici u novinama, naglašavajući da se ta mogućnost ne smije propustiti.

“Sedam stranaka koje će danas formirati novo Vijeće ministara su se obavezale da će slijediti program koji jasno stavlja evropsku integraciju Bosne i Hercegovine, koja je nesumnjiva želja većine građana ove zemlje, na vrh programa rada,” napisao je Schwarz-Schilling u članku koji je danas objavljen u *Dnevnom avazu*, *Nezavisnim novinama* i *Večernjem listu*. “Prva stavka njihove januarske platforme je obećanje da će se postići dogovor oko reforme policije. Sada je vrijeme da se to obećanje i ispuni.”

Tri principa Evropske unije – da se sve zakonodavne i budžetske nadležnosti za sva pitanja policije moraju nalaziti na državnom nivou; da nema političkog uplitanja u operativni rad policije; i da se funkcionalne lokalne policijske oblasti moraju utvrditi na osnovu tehničkih kriterija za rad policije, predstavljaju sastavni dio Sporazuma iz oktobra 2005. godine, koji su prihvatili državni Parlament i parlamenti dva entiteta.

Nakon toga je Direkcija za restrukturiranje policije razradila principe u tehnički izvještaj koji je upućen Vijeću ministara. Prošlo je više od mjesec dana od kada je dostavljen izvještaj Direkcije i sve strane su imale vremena da ga prostudiraju i razmotre njegov sadržaj. Imajući na umu razgovore u toku protekle tri godine, pitanja i moguća rješenja su već dobro poznata.

Da bi se ispunila obećanja data u Političkom sporazumu iz oktobra 2005. godine entitetske i državna vlade i parlamenti su trebali usvojiti plan provedbe najkasnije do 2. marta. Ovaj rok najvjerojatnije neće biti ispunjen. Ali kako su to jasno rekli politički direktori Vijeća za implementaciju mira u decembru dogovor mora biti postignut prije kraja marta.

“Ukoliko se to ne dogodi doći će do značajnog odlaganja Sporazuma o stabilizaciji i pridruživanju, najvjerojatnije do 2008. godine,” napisao je Schwarz-Schilling. “Politički lideri trebaju pažljivo razmisliti da li sebi mogu priuštiti da propuste ovu mogućnost. Oni koji utiču na javno mišljenje, građani i mediji, trebaju takođe pažljivo pratiti kako lideri obavljaju svoj posao i da li ispunjavaju svoja obećanja.”

“Izvještaj Direkcije predstavlja rezultat mnogih mjeseci rada i intenzivnih diskusija među policijskim stručnjacima. On predstavlja izvrsnu osnovu za dalje korake i osigurava rješenja koja su prihvatljiva za sve”, napisao je visoki predstavnik i specijalni predstavnik Evropske unije. “Ukoliko to bude neophodno moj Ured i drugi međunarodni partneri su spremni da pruže podršku političkim razgovorima.”

Schwarz-Schilling je takođe naglasio da postoji mnogo poticaja da se postigne dogovor. “Reforma policije je više od samog utiranja puta za Sporazum o stabilizaciji i pridruživanju i sigurnog mjesta za Bosni i Hercegovinu u Evropi; tu se prije svega radi o tome da Bosna i Hercegovina postane sigurnije i bolje mjesto za život,” napisao je Schwarz-Schilling.

“Što se prije dogovori i implementira reforma policije prije će Bosna i Hercegovina krenuti putem Evropske unije i prije će vlasti ove zemlje biti u mogućnosti da se efikasno pozabave pitanjem kriminala”, zaključio je Schwarz-Schilling. Očekujem da političari u ovoj zemlji, a posebno članovi nove vlade i lideri političkih stranaka, postupaju u skladu sa svojim odgovornostima.”

Tekst sedmične rubrike visokog predstavnika/specijalnog predstavnika Evropske unije možete vidjeti na www.ohr.int i www.eusrbih.org.